

四庫全書

集部

欽定四庫全書

御定全唐詩錄卷七十四

杜牧 二

近體詩 二

長安雜題

觚稜金碧照山高萬國珪璋捧楮袍  
舐筆和鈇欺賈馬讚功論道鄙蕭曹  
東南樓日珠簾捲西北天宛玉卮豪  
四海一家無一事將軍攜鏡泣霜毛

晴雲似絮惹低空紫陌微微弄袖風韓嫣金丸莎覆綠  
許公羈汗杏粘紅煙生窈窕深東第輪撼流蘇下北宮  
自笑苦無樓護智可憐鈿槩竟何功

雨晴九陌鋪江練嵐嫩千峯疊海濤南苑草芳眠錦雉  
夾城雲暖下霓旄少年羈絡青紋玉遊女花簪紫蒂桃  
江碧柳深人盡醉一瓢顏巷日空高

東帶謬趨文石陛有章曾拜皂囊封期嚴無奈睡留癖  
勢窘猶為酒泥慵偷釣侯家池上雨醉吟隋寺日沉鐘

九原可作吾誰與師友瑯琊邴曼容

洪河清渭天池濬太白終南地軸橫祥雲輝映漢宮紫  
春光繡畫秦川明草妬佳人鈿朶色風迴公子玉銜聲  
六飛南幸芙蓉苑十里飄香入夾城

豐貂長組金張輩駟馬文衣許史家白鹿原頭迴獵騎  
紫雲樓下醉江花九重樹影連清漢萬壽山光學翠華  
誰識大君謙讓德

聖上不  
受徽號

一毫名利鬪鼃墓

街西長句

碧池新漲浴嬌鴉分鑠長安富貴家遊騎偶同人鬪酒  
名園相倚杏交花銀鞦駉裊嘶宛馬繡鞅璉瓏走鈿車  
一曲將軍何處笛連雲芳樹日初斜

懷鍾陵舊遊

一謁征南最少年虞卿雙壁截肪鮮歌謠千里春長暖  
絲管高臺月正圓玉帳軍籌羅俊彥絳帷環珮立神仙  
陸公餘德機雲在如我酬恩合執鞭

滕閣中春綺席開柘枝蠻鼓殷晴雷垂樓萬幕青雲合

破浪千帆陣馬來未掘雙龍牛斗氣高懸一榻棟梁材  
連巴控越知何有珠翠沉檀處處堆

十頃平湖堤柳合岸秋蘭芷綠纖纖一聲明月采蓮女  
四面朱樓卷畫簾白鷺煙分光的的微漣風定翠湔湔  
斜暉更落西山影千步虹橋氣象兼

控壓平江十萬家秋來江靜鏡新磨城頭晚鼓雷霆後  
橋上遊人笑語多日落汀痕千里色月當樓午一聲歌  
昔年行樂穠桃畔醉與龍沙揀蜀羅

潤州

句吳亭東千里秋放歌曾作昔年遊青苔寺裏無馬跡  
綠水橋邊多酒樓大抵南朝皆曠達可憐東晉最風流  
月明更想桓伊在一笛閒吹出塞愁

謝朓詩中佳麗地夫差傳裏水犀軍城高鐵瓮橫強弩  
柳暗朱樓多夢雲畫角愛飄江北去釣歌長向月中聞  
揚州塵土試迴首不惜千金借與君

九日齊安登高

江涵秋影鴈初飛與客攜壺上翠微塵世難逢開口笑  
菊花須插滿頭歸但將醕酌酬佳節不用登臨恨落暉  
古往今來只如此牛山何必獨霑衣

登池州九峯樓寄張祜

百感中來不自由角聲孤起夕陽樓碧山終日思無盡  
芳草何年恨即休睫在目前長不見道非身外更何求  
誰人得似張公子千首詩輕萬戶侯

八月十二日得替後移居雪溪館因題長句四韻



萬家相慶喜秋成處處樓臺歌板聲千歲鶴歸猶有恨  
一年人住豈無情夜涼溪館留僧話風定蘇潭看月生  
景物登臨閒始見願為閒客此閒行

題青雲館

虬蟠千仞劇羊腸天府由來百二強四皓有芝輕漢祖  
張儀無地與懷王雲連帳影蘿陰合枕遶泉聲客夢涼  
深處會容高尚者水苗三頃百株桑

題宣州開元寺水閣閣下宛溪夾溪居人

六朝文物草連空  
天澹雲閒今古同  
鳥去鳥來山色裏  
人歌人哭水聲中  
深秋簾幙千家雨  
落日樓臺一笛風  
惆悵無因見范蠡  
參差煙樹五湖東

寄題甘露寺北軒

曾向蓬萊宮裏行  
北軒欄檻最留情  
孤高堪弄桓伊笛  
縹緲宜聞子晉笙  
天接海門秋水色  
烟籠隋苑暮鐘聲  
他年會着荷衣去  
不向山僧道姓名

今皇帝陛下  
一詔徵兵  
不日功集  
河湟諸郡次第

歸降臣獲覩聖功輒獻歌詠

捷書皆應睿謀期十萬曾無一鏃遺漢武慚誇朔方地  
宣王休道太原師威加塞外寒來早恩入河源凍合遲  
聽取滿城歌舞曲涼州聲韻喜參差

奉和白相公聖德和平致茲休運歲終功就合詠  
盛明呈上三相公長句四韻

行看臘破好年光萬壽南山對未央點戛可汗修職貢  
文思天子復河湟應須日御西巡狩不假星弧北射狼

吉甫裁詩歌盛業一篇江漢羨宣王

正初酬歙州刺史邢羣

翠巖千尺倚溪斜曾得嚴光作釣家  
越嶂遠分丁字水臘梅遲見二年花  
明時刀尺君須用幽處田園我有涯  
一壑風烟陽羨里解龜休去路非賒

酬張祜處士見寄長句四韻

七子論詩誰似公曹劉須在指揮中  
薦衡昔日知文舉

令狐相公曾

表薦處士

乞火無人作蒯通北極樓臺長掛夢西江

波浪遠吞空可憐故國三千里虛唱歌詞滿六宮

處士詩曰

故國三千里深宮二十年  
一聲河滿子雙淚落君前

### 湖南正初招李郢秀才

行樂及時時已晚對酒當歌歌不成千里暮山重疊翠  
一溪寒水淺深清高人以飲為忙事浮世除詩盡強名  
看看白蘋芽欲吐雪舟相訪勝閒行

初春雨中舟次和州橫江裴使君見迎李趙二秀

才同來因書四韻兼寄江南許渾先輩

芳草渡頭微雨時萬株楊柳拂波垂蒲根水暖雁初浴  
梅徑香寒蜂未知詞客倚風吟黯淡使君迴馬濕旌旗  
江南仲蔚多情調悵望春陰幾首詩

早鴈

金河秋半鹵弦開雲外驚飛四散哀仙掌月明孤影過  
長門燈暗數聲來須知胡騎紛紛在豈逐春風一一迴  
莫厭瀟湘少人處水多菰米岸莓苔

聞慶州趙縱使君與黨項戰中箭身死長句

將軍獨乘鐵驄馬榆溪戰中金僕姑死綬却是古來有  
驍將自驚今日無青史文章爭點筆朱門歌舞笑捐軀  
誰知我亦輕生者不得君王丈二笏

殘春獨來南亭因寄張祜

暖雲如粉草如茵獨步長堤不見人一嶺桃花紅錦蹀  
半溪山水碧羅新高枝百舌猶欺鳥帶葉梨花獨送春  
仲蔚欲知何處在苦吟林下拂詩塵

送杜顓赴潤州幕

少年才俊赴知音  
丞相門欄不覺深  
直道事人男子業  
異鄉加飯弟兄心  
還須整理韋弦佩  
莫獨矜誇玳瑁簪  
若去上元懷古處  
謝安墳下與沉吟

閨情代作

梧桐葉落雁初歸  
迢遞無因寄遠衣  
月照石泉金點冷  
鳳酣簫管玉聲微  
佳人力杵秋風外  
蕩子從征夢寐稀  
遙望戍樓天欲曉  
滿城鼙鼓白雲飛

宣州留贈



紅鈿濕盡半羅裙  
洞府人間手欲分  
滿面風流雖似玉  
四年夫壻恰如雲  
當春離恨杯長滿  
倚柱闌情日漸曛  
為報眼波須穩當  
五陵遊蕩莫知聞

長安秋望

樓倚霜樹外  
鏡天無一毫  
南山與秋色  
氣勢兩相高

江樓

獨酌芳春酒  
登樓已半醺  
誰驚一行雁  
衝斷過江雲

將赴吳興登樂遊原

清時有味是無能  
閒愛孤雲靜愛僧  
欲把一麾江海去  
樂遊原上望昭陵

秋浦途中

蕭蕭山路窮  
秋雨浙浙溪  
風一岸蒲為問  
寒沙新到雁  
來時還下杜陵無

江南春

千里鶯啼綠映紅  
水村山郭酒旗風  
南朝四百八十寺  
多少樓臺煙雨中

齊安郡中偶題

兩竿落日溪橋上半縷輕烟柳影中多少綠荷相倚恨  
一時迴首背西風

秋聲無不攪離心夢澤蒹葭楚雨深自滴堦前大梧葉  
千君何事動哀吟

題齊安城樓

鳴軋江樓角一聲微陽澗澗落寒汀不用憑欄苦回首  
故鄉七十五長亭

村舍燕

漢宮一百四十五多下珠簾閉  
瑣窓何處營巢夏將半  
茅簷烟裏語雙雙

入茶山下題水口草市

倚溪侵嶺多高樹  
誇酒書旗有小樓  
驚起鴛鴦豈無恨  
一雙飛去却迴頭

漢江

溶溶漾漾白鷗飛  
綠淨春深好染衣  
南去北來人自老

夕陽長送釣船歸

念昔遊

十載飄然繩檢外  
罇前自獻自為酬  
秋山春雨閒吟處  
倚遍江南寺寺樓

李白題詩水西寺

宣州  
涇縣

古木迴巖樓閣風  
半醒半醉遊

三日紅白花開山雨中

題禪院

觥船一棹百分空  
十歲青春不負公  
今日鬢絲禪榻畔

茶煙輕颺落花風

春申君

烈士思酬國士恩  
春申誰與快冤魂  
三千賓客總朱履  
欲使何人殺李園

題烏江亭

勝敗兵家事不期  
包羞忍恥是男兒  
江東子弟多才俊  
捲土重來未可知

登樂遊原

長空澹澹孤鳥沒萬古消沈向此中看取漢家何似業  
五陵無樹起秋風

赤壁

折戟沉沙鐵未銷自將磨洗認前朝東風不與周郎便  
銅雀春深鎖二喬

題橫江館

孫家兄弟晉龍驤馳騁功名業帝王至竟江山誰是主  
蒼磯空屬釣魚郎

泊秦淮

烟籠寒水月籠沙  
夜泊秦淮近酒家  
商女不知亡國恨  
隔江猶唱後庭花

過勤政樓

千秋佳節名空在  
承露絲囊世已無  
唯有紫苔偏稱意  
年年因雨上金鋪

過華清宮

長安迴望繡成堆  
山頂千門次第開  
一騎紅塵妃子笑



無人知是荔枝來

新豐綠樹起黃埃  
數騎漁陽探使迴  
霓裳一曲千峯上  
舞破中原始下來

題桃花夫人

即息夫人

細腰宮裏露桃新  
脉脉無言度幾春  
至竟息亡緣底事  
可憐金谷墮樓人

題木蘭廟

彎弓征戰作男兒  
夢裏曾經與畫眉  
幾度思歸還把酒

拂雲堆上祝明妃

讀韓杜集

杜詩韓集愁來讀似倩麻姑  
癢處抓天外鳳凰誰得髓  
無人解合續弦膠

出宮人

閒吹玉殿昭華管  
醉折梨園縹蒂花  
十年一夢歸人世  
絳縷猶封繫臂紗

鄭瓘協律

廣文遺韻留樗散雞犬圖書共一船  
自說江湖不歸事  
阻風中酒過年年

贈朱道靈

劉根丹篆三千字郭璞青囊兩卷書  
牛渚磯南謝山北  
白雲深處有巖居

寄揚州韓綽判官

青山隱隱水迢迢秋盡江南草木凋  
二十四橋明月夜  
玉人何處教吹簫

送李羣玉赴舉

故人別來面如雪一榻拂雲秋影中  
玉白花紅三百首  
五陵誰唱與春風

送隱者

無媒徑路草蕭蕭自古雲林遠市朝公道世間唯白髮  
貴人頭上不曾饒

贈別

娉娉裊裊十三餘  
苴蔻梢頭二月初  
春風十里揚州路

卷上珠簾總不如

多情却似總無情  
惟覺樽前笑不成  
蠟燭有心還惜別  
替人垂淚到天明

宮詞

監宮引出暫開門  
隨例須朝不是恩  
銀鑰却收金鎖合  
月明花落又黃昏

秋夕

銀燭秋光冷畫屏  
輕羅小扇撲流螢  
天階夜色涼如水

卧看牽牛織女星

山行

遠上寒山石徑斜  
白雲生處有人家  
停車坐愛楓林晚  
霜葉紅於二月花

南陵道中

南陵水面漫悠悠  
風緊雲輕欲變秋  
正是客心孤迥處  
誰家紅袖凭江樓

遊邊

黃沙連海路無塵邊草長枯不見春日暮拂雲堆下過  
馬前途著射雕人

早春題真上人院

清羸已近百年身古寺風煙又一春寰海自成戎馬地  
唯師曾是太平人

金谷園

繁華事散逐香塵流水無情草自春日暮東風怨啼鳥  
落花猶似墮樓人

華清宮

零葉翻紅萬樹霜  
玉蓮開蕊暖泉香  
行雲不下朝元閣  
一曲淋鈴淚數行

贈獵騎

已落雙雕血尚新  
鳴鞭走馬又翻身  
憑君莫射南來雁  
恐有家書寄遠人

贈漁父

蘆花深澤靜垂綸  
月夕烟朝幾十春  
自說孤舟寒水畔



不曾逢着獨醒人

贈終南蘭若僧

北闕南山是故鄉  
兩枝仙桂一時芳  
休公都不知名姓  
始覺禪門氣味長

江上

楚鄉寒食橘花時  
野渡臨風駐綵旗  
草色連雲人去住  
水紋如縠燕參差

許秀才至辱李蘄州絕句問斷酒之情因寄

有客南來話所思  
故人遙枉醉中詩  
暫因微疾須防酒  
不是歡情減舊時

懷吳中馮秀才

長洲苑外草蕭蕭  
却算遊程歲月遙  
唯有別時今不忘  
暮烟秋雨過楓橋

閒題

男兒所在即為家  
百鎰黃金一朶花  
借問春風何處好  
綠楊深巷馬頭斜

偶見

朔風高緊掠河樓  
白鼻騮郎白鬪裘  
有箇當壚明似月  
馬鞭斜揖笑回頭

歎花

自是尋春去校遲  
不須惆悵怨芳時  
狂風落盡深紅色

綠葉成陰子滿枝

據言云牧佐宣城幕遊湖州刺史崔君張水戲使州人畢觀令牧間行閱

奇麗得垂髻者十餘歲後十四年牧刺湖州其人已嫁生子矣乃悵而為詩

李尚書席上作

華堂今日綺筵開  
誰喚分司御史來  
偶發狂言驚滿座  
兩行粉面一時回

遣懷

落魄江湖載酒行  
楚腰纖細掌中情  
十年一覺揚州夢  
贏得青樓薄倖名

月

三十六宮秋夜深  
昭陽歌斷信沉沉  
唯應獨伴陳皇后  
照見長門望幸心

斑竹筒簾

血染斑斑成錦紋  
昔年遺恨至今存  
分明知是湘妃泣  
何忍將身卧淚痕

邊上聞胡笳

何處吹笳薄暮天  
塞垣高鳥沒狼烟  
遊人一聽頭堪白  
蘇武曾經十九年

子規

蜀地曾聞子規鳥  
宣城又見杜鵑花  
一叫一回腸一斷


三春三月憶三巴

同趙二十二訪張明府郊居聯句

陶潛官罷酒餅空門掩楊花一夜風牧古調詩吟山色

裏無絃琴在月明中嘏遠簷高樹宜幽鳥出岫孤雲逐

晚虹牧別後東籬數枝菊不知閒醉與誰同嘏



御定全唐詩錄卷七十四

欽定四庫全書

集部

御定全唐詩錄卷七十五

六

詳校官左中允<sub>臣</sub>璿五珠

主事銜<sub>臣</sub>徐以坤覆勘

總校官原任中允<sub>臣</sub>王燕緒

校對官中書<sub>臣</sub>田尹衡

謄錄監生<sub>臣</sub>黃廷璧



欽定四庫全書

御定全唐詩錄卷七十五

李商隱

商隱字義山懷州河內人幼為文令狐楚鎮河陽以所業文干之年纔及弱冠楚以其少俊深禮之令與諸子遊楚鎮天平汴州從為巡官歲給資裝令隨計上都開成二年方登進士第釋褐秘書省校書郎調補弘農尉會昌二年又以書判拔萃王

茂元鎮河陽辟為掌書記得侍御史茂元愛其才以子妻之茂元雖讀書為儒然本將家子李德裕厚遇之時德裕秉政用為河陽帥德裕與李宗閔楊嗣復令狐楚大相讐怨商隱既為茂元從事宗閔黨大薄之時令狐楚已卒子絢為員外郎以商隱背恩尤惡其無行俄而茂元卒來遊京師久之不調會給事中鄭亞廉察桂州請為觀察判官檢校水部員外郎大中初白敏中執政令狐在內署

共排李德裕逐之亞坐德裕黨亦貶循州刺史商  
隱隨亞在嶺表累載三年入朝京兆尹盧弘正奏  
署掾曹令典牋奏明年令狐絢作相商隱屢啓陳  
情絢不之省弘正鎮徐州又從為掌書記府罷入  
朝復以文章干絢乃補太學博士會河南尹柳仲  
郢鎮東蜀辟為節度判官檢校工部郎中大中末  
仲郢坐專殺左遷商隱廢罷還鄭州未幾卒商隱  
能為古文不喜偶對從事令狐楚幕楚能章奏遂

以其道授商隱自是始為今體章奏博學強記下  
筆不能自休尤善為誄奠之詞與太原溫庭筠南  
郡段成式齊名時號三十六體文思清麗視庭筠  
過之而俱無特操恃才詭激為當塗者所薄名宦  
不進坎壈終身

商隱自序年十六著才論聖論後恣展古集咽處  
於任范徐庾之間作文或時得好對切事聲勢物  
景哀上浮壯能感動人

又自述云夙聞妙喻常在道場至於南國妖姬叢  
臺妙妓雖有涉於篇什實不接於風流可使國人  
盡保展禽酒肆無疑阮籍

陸魯望曰吾聞淫畋漁者謂之暴天物天物且不  
可暴又可抉摘刻削露其情狀乎使自萌卵至于  
槁死不能隱伏天能不致罰耶長吉天東野窮玉  
溪生官不挂朝籍而死正坐是哉正坐是哉

古今詩話楊大年錢文僖晏元獻劉子儀為詩皆

宗義山號西崑體後進效之多竊取義山詩句嘗  
內宴優人有為義山者衣服敗裂告人曰吾為諸  
館職搨捨至此聞者大噱

蔡寬夫云荆公晚年喜義山詩以為唐人知學老  
杜而得其藩籬唯義山一人而已每誦其雪嶺未  
歸天外使松州猶駐殿前軍永憶江湖歸白髮欲  
迴天地入扁舟與池光不受月暮氣欲沉山江海  
三年客乾坤一戰場之類雖老杜無以過也

楊文公談苑義山為文多簡閱書冊左右鱗次號  
獺祭魚

紀事云義山少遊投宿逆旅主人會客召與坐不  
知其為義山也酒酣席客賦木蘭花詩義山後就  
曰洞庭波冷曉侵雲日日征帆送遠人幾度木蘭  
舟上望不知船是此花身坐客覽之大驚詢之乃  
義山也

范元實詩眼曰文章貴衆中傑出同賦一事工拙

易見予行蜀道過籌筆驛如石曼卿詩意中流水  
遠愁外舊山青有山水處便可用不必籌筆驛也  
殷潜之與小杜詩甚健麗亦無高意惟義山詩云  
猿鳥猶疑畏簡書風雲長為護儲胥簡書軍中法  
令約束言號令嚴明雖千百年之後猿鳥猶畏之  
也儲胥軍中籥籬言忠義貫神明風雲猶為護其  
壁壘也誦此二語使人凜然復見孔明風烈至於  
管樂有才終不忝關張無命復何如屬對親切又



有議論他人不及也馬嵬驛唐詩尤多如劉夢得  
綠野扶風道一篇人頗誦之其淺近乃兒童所能  
義山云海內徒聞更九州他生未卜此生休語極  
親切故不用墮淚愁怨等字而聞者為之深悲空  
聞虎旅鳴宵柝無復雞人報曉籌如親扈明皇寫  
出當時物色此日六軍同駐馬他時七夕笑牽牛  
益奇義山詩世人但知其巧麗與溫庭筠齊名蓋  
俗學止得其皮膚其高情遠意皆不識也

古體詩

無題

八歲偷照鏡長眉已能畫十歲去踏青芙蓉作裙衩十  
二學彈箏銀甲不曾卸十四藏六親懸知猶未嫁十五  
泣春風背面鞦韆下

房中曲

薔薇泣幽素翠帶花錢小嬌郎癡若雲抱日西簾曉枕  
是龍宮石割得秋波色玉簾失柔膚但見蒙羅碧憶得

前年春未語含悲辛歸來已不見錦瑟長於人今日澗  
底松明日山頭檠愁到天池翻相看不相識

效徐陵體贈更衣

密帳真珠絡溫幃翡翠裝楚腰知便寵宮眉正鬪強結  
帶懸梔子繡領刺鴛鴦輕寒衣省夜金斗熨沉香

江南曲

郎船安兩槳儂舸動雙橈掃黛開宮額裁裙約楚腰垂  
期方積思臨酒欲拌拚嬌莫以採菱唱欲羨秦臺簫

宮中曲

雲母瀟宮月夜夜白於水賺得羊車來低扇遮黃子水  
精不覺冷自刻鴛鴦翅蠶縷茜香濃正朝纏左臂巴牋  
兩三幅滿寫承恩字欲得識青天昨夜蒼龍是

柳枝

有序

柳枝洛中里娘也父饒好賈風波死湖上其母  
不念他兒子獨念柳枝生十七年塗妝縮髻未  
嘗竟已復起去吹葉嚼蕊調絲擲

音葉

管作天海

風濤之曲幽憶怨斷之音居其傍與其家接故

往來者聞十年尚相與疑其醉眠夢

一本有物字

斷

不聘余從昆讓山比柳枝居為近他日春曾陰

讓山下馬柳枝南柳下詠余燕臺詩柳枝驚問

誰人有此誰人為是讓山謂曰此吾里中少年

叔耳柳枝手斲長帶結讓山為贈叔乞詩明日

余比馬出其巷柳枝了鬟畢妝抱立扇下風郭

一袖指曰若叔是

句

後三日隣當去湔裙水上

以博香山待與郎俱過余諾之會所友有偕當  
詣京師者戲盜余卧裝以先不果留雪中讓山  
至且曰為東諸侯取去矣明年讓山復東相背  
於戲上因寓詩以墨其故處云

花房與蜜脾蜂雄蛺蝶雌同時不同類那復更相思  
本是丁香樹春條結始生玉作彈碁局中心亦不平

嘉瓜引蔓長碧玉冰

去聲

寒漿東陵雖五色不忍值

治去聲

牙香

柳枝井上蟠蓮葉浦中乾錦鱗與繡羽水陸有傷殘  
畫屏繡步障物物自成雙如何湖上望只是見鴛鴦

李肱所遺畫松詩書兩紙得四十韻

萬草已涼露開圖披古松青山徧滄海此樹生何峯孤  
根邈無倚直立撐鴻濛端如君子身挺若壯士胸樛枝  
勢夭矯忽欲蟠拏空又如驚螭走默與奔雲逢孫枝擢  
細葉旖旎狐裘茸鄒顛蓍髮軟麗姬眉黛濃視久眩目  
睛倏忽變輝容竦削正稠直婀娜旋數峯又如洞房冷

翠被張穹籠亦若暨蘿女平旦妝顏容細疑襲氣母猛  
若爭神功燕雀固寂寂霧露常衝衝香蘭愧傷暮碧竹  
慚空中可集呈瑞鳳堪藏行雨龍淮山桂偃蹇蜀郡桑  
重童枝條亮眇脆靈氣何由同昔聞咸陽帝近說嵇山  
儂或著仙人號或以大夫封終南與清都烟雨遙相通  
安知夜夜意不起西南風美人昔清興重之猶月鐘寶  
筍十八九香緹千萬重一旦鬼瞰室稠疊張纍量  
童音鷹  
赤羽中要害是非皆忽忽生如碧海月死踐霜郊蓬平



生握中玩散失隨奴僮我聞照妖鏡及與神劍鋒寓身  
會有地不為凡物蒙伊人秉茲圖顧盼擇所從而我何  
為者開顏捧靈蹤報以漆鳴琴懸之真珠櫳是時方暑  
夏座內若嚴冬憶昔謝四騎學仙玉陽東千株盡若此  
路入瓊瑤宮口咏玄雲歌手把金芙蓉濃藹深霓袖色  
映琅玕中悲哉墮世網去之若遺弓形魄天壇上海日  
高瞳瞳終騎紫鸞歸持寄扶桑翁

戲題樞言草閣三十二韻

君家在河北我家在山西百歲本無異陰陰仙李枝尚  
書文與武戰罷幕府開君從渭南至我自仙遊來平昔  
苦南北動成雲雨乘逮今兩攜手對若牀下鞋夜歸碣  
石館朝上黃金臺我有苦寒調君抱陽春才年顏各少  
壯髮綠齒尚齊我雖不能飲君時醉如泥政靜籌畫簡  
退食多相攜掃掠走馬路整頓射雉翳春風二三月柳  
密鴛正啼清河在門外上與浮雲齊欵冠調玉琴彈作  
松風哀又彈明君怨一去怨不迴感激坐者泣起視雁

行低翻憂龍山雪却雜胡沙飛仲容銅琵琶項直聲淒  
淒上貼金捍撥畫為承露雞君時卧振觸勸客白玉杯  
苦云年光疾不飲將安歸我賞此言是因循未能諧君  
言中聖人坐卧莫我違榆莢亂不整楊花飛相隨上有  
白日照下有東風吹青樓有美人顏色如玫瑰歌聲入  
青雲所痛無良媒少年苦不久顧慕良難哉徒令真珠  
眊衰入珊瑚腮君今且少安聽我苦吟詩古詩何人作  
老大徒傷悲

驕兒詩

衮師我驕兒美秀乃無匹文葆未周晬固已知六七四  
歲知名姓眼不視梨栗交朋頗窺觀謂是丹穴物前朝  
尚器貌流品方第一不然神仙姿不爾燕鶴骨安得此  
相謂欲慰衰朽質青春妍和月朋戲渾甥姪繞堂復穿  
林沸若金鼎溢門有長者來造次請先出客前問所須  
含意不吐實歸來學客面闕羽委切敗叟爺笏或謔張飛  
胡或笑鄧艾吃豪鷹毛翦劣猛馬氣佶僂截得青篋當

騎走恣唐突忽復學叅軍按聲喚蒼鶻又復紗燈倚稽  
首禮夜佛仰鞭罥蛛網俯首飲花蜜欲爭蚨蝶輕未謝  
柳絮疾階前逢阿姊六甲頗輸失疑走弄香奩拔脫金  
屈戍抱持多反側威怒不可律曲躬牽窗網絡唾拭琴  
漆有時看臨書挺立不動膝古錦請裁衣玉軸亦欲乞  
請爺書春勝春勝宜春日芭蕉斜卷箋辛夷低過筆爺  
昔好讀書懇苦自著述顛顛欲四十無肉畏蚤虱兒慎  
勿學爺讀書求甲乙穰苴司馬法張良黃石術便為帝

王師不假更纖悉况今西與北羌戎正狂悖誅赦兩未  
成將養如痼疾兒當速成大探雖入虎穴當為萬戶侯  
勿守一經帙

行次西郊作一百韻

蛇年建丑月我自梁還秦南下大散關北濟渭之濱草  
木半舒坼不類冰雪晨又若夏苦熱焦卷無芳津高田  
長檨墮下田長荆榛農具棄道傍饑牛死空墩依依過  
村落十室無一存存者背面啼無衣可迎賓始若畏人

問及門還具陳右輔田疇薄斯民常苦貧伊昔稱樂土  
所賴牧伯仁官清若冰玉吏善如六親生男不遠征生  
女事四隣濁酒盈瓦缶爛穀堆荆困健兒庇旁婦衰翁  
舐童孫況自貞觀後命官多儒臣例以賢牧伯徵入司  
陶鈞降及開元中姦邪撓經綸晉公忌此事多錄邊將  
勲因令猛毅輩雜牧昇平民中原遂多故除授非至尊  
或出倖臣輩或由帝戚恩中原因屠解奴隸厭肥豚皇  
子棄不乳椒房抱羌渾重賜竭中國強兵臨北邊控弦

二十萬長臂皆如猿皇都三千里來往同鷓鴣爲五里一  
換馬十里一開筵指顧動白日暖熱迴蒼昊公卿辱朝  
叱唾棄如糞丸大朝會萬方天子正臨軒綵旂轉初旭  
玉座當祥烟金障既特設珠簾亦高褰捋鬚蹇不顧坐  
在御榻前忤者死跟屨附之升頂顛華侈矜遞街豪俊  
相併吞因失生惠養漸見徵求頻奚冠西當作東北來揮  
霍如天翻是時正忘戰重兵多在邊列城遶長河平明  
插旗旛但聞虜騎入不見漢兵屯大婦抱兒哭小婦攀



車轡生小太平年不識夜閉門少壯盡點行疲老守空  
村生分作死誓揮淚連秋雲廷臣例麀怯諸軍如羸奔  
為賊掃上陽捉人送潼關玉輦望南斗未知何日旋誠  
知開闢久邁此雲雷屯逆者問鼎大存者要高官搶攘  
互間諜孰辨梟與鸞千馬無返轡萬車無還轅城空鼠  
雀死人去豺狼喧南資竭吳越西費失河源因令左藏  
庫摧毀惟空垣如人當一身有左無右邊筋體半痿痺  
肘腋生臊臙列聖蒙此恥含懷不能宣謀臣拱手立相

戒無敢先萬國困杼軸內庫無金錢健兒立霜雪腹歎  
衣裳單饋餉多過時高估銅與鉛山東望河北爨烟猶  
相聯朝廷不暇給辛苦無半年行人推行資居者稅屋  
椽中間遂作梗狼籍用戈鋌臨門送節制以錫通天班  
破者以族滅存者尚遷延禮數異君父羈縻如羌零直  
求輸赤誠所望大體全巍巍政事堂宰相厭八珍敢問  
下執事今誰掌其權瘡疽幾十載不敢抉其根國感賦  
更重人稀役彌繁近年牛醫兒城社更扳援盲目把大

旆處此京西藩樂禍忘怨敵樹黨多狂狷生為人所  
憚死非人所憐快刀斷其頭列若猪羊懸鳳翔三百  
里兵馬如黃巾夜半軍牒來屯兵萬五千鄉里駭供  
億老少相扳牽兒孫生未孩棄之無慘顏不復議所  
適但求死山間爾來又三歲甘澤不及春盜賊亭午  
起問誰多窮民節使殺亭吏捕之恐無因咫尺不相  
見旱久多黃塵官健腰佩弓自言為官巡常恐值荒  
迴此輩還射人愧客問本末願客無因循郿塢抵陳

倉此地忌黃昏我聽此言罷冤憤如相焚昔聞舉一  
會羣盜為之奔又聞理與亂在人不在天我願為此  
事君前剖心肝叩頭出鮮血滂沱污紫宸九重黥已  
隔涕泗空沾唇史典作尚書廝養為將軍慎勿道此  
言此言未忍聞

井泥四十韻

皇都依仁里西北有高齋昨日主人氏治井堂西陲  
工人三五輩輦出土與泥到水不數尺積共庭樹齊

他日井甃畢用土蓋作堤曲隨林掩映繚以池周迴  
下去冥冥穴上承雨露滋寄辭別地脉因言謝泉扉  
昇騰不自意疇昔忽已乖伊余掉行鞅行行來自西  
一日下馬到此時芳草萋四面多好樹旦暮雲霞姿  
晚落花滿地幽鳥鳴何枝蘿幄旣已薦山樽亦可開  
待得孤月上如與佳人來因茲感物理惻愴平生懷  
茫茫此羣品不定輪與蹄喜得舜可禪不以瞽瞍  
疑禹竟代舜立其父吁咈哉嬴氏并六合所來因不

韋漢祖把左契自言一布衣當塗佩國璽本乃黃門  
攜長戟亂中原何妨起戎氏不獨帝王耳臣下亦如  
斯伊尹佐興王不藉漢父資礪溪老釣叟坐為周之  
師屠狗與販繒突起定傾危長沙啟封土豈是出程  
姬帝問主人翁有自賣珠兒武昌昔男子老苦為人  
妻蜀王有遺魄今在林中啼淮南雞舐藥翻向雲中  
飛大鈞運羣有難以一理推顧於冥冥內為問秉耜者  
誰我恐更萬世此事愈云為猛虎與雙翅更以角副

之鳳凰不五色聯翼上雞栖我欲秉釣者竭來與我  
偕浮雲不相顧寥泝誰為梯悒快夜將半但歌井中  
泥

韓碑

元和天子神武姿彼何人哉軒與義誓將上雪列聖  
恥坐法宮中朝四夷淮西有賊五千載封狼生貙貙  
生羆不據山河據平地長戈利矛日可麾帝得聖相  
相曰度賊斫不死神扶持腰懸相印作都統陰風慘

澹天王旗愬武古通

一作道

作牙爪儀曹外郎載筆隨

行軍司馬志且勇十四萬衆猶虎貌入蔡縛賊獻太  
廟功無與讓恩不訾帝曰汝度功第一汝從事愈宜  
為辭愈拜稽首蹈且舞金石刻畫臣能為古者世稱  
大手筆此事不繫於職司當仁自古有不讓言訖屢  
頷天子頤公退齋戒坐小閣濡染大筆何淋漓點竄  
堯典舜典字塗改清廟生民詩文成破體書在紙清  
晨再拜鋪丹墀表曰臣愈昧死上詠神聖功書之碑



碑高三丈字如斗負以靈螯蟠以螭句竒語重喻者  
少讒之天子言其私長繩百尺拽碑倒麓砂大石相  
磨治公之斯文若元氣先時已入人肝脾湯盤孔鼎  
有述作今無其器存其辭嗚呼聖皇及聖相相與烜  
赫流淳熙公之斯文不示後曷與三五相攀追願書  
萬本誦萬遍口角流沫右手胝傳之七十有二代以  
為封禪玉檢明堂基

燕臺詩四首

風光冉冉東西陌，幾日嬌魂尋不得。蜜房羽客類芳  
心，冶葉倡條徧相識。暖藹輝遲桃樹西，高鬟立共桃  
鬟齊。雄龍雌鳳杳何許，絮亂絲繁天亦迷。醉起微陽  
若初曙，映簾夢斷聞殘語。愁將鐵網罨珊瑚，海濶  
天翻迷處所。衣帶無情有寬窄，春烟自碧秋霜白。  
研丹擘石天不知，願得天牢鎖冤魄。夾羅委篋單  
綃起，香肌冷襯瑩瑩珮。今日東風自不勝，化作幽  
光入西海。

右春

前閣雨簾愁不卷後堂芳樹陰陰見石城景物類黃泉  
夜半行郎空柘彈綾扇喚風閭闔天輕帷翠幕波迴旋  
蜀魄寂寞有伴未幾夜瘴花開木棉桂宮流影光難取  
媽薰蘭破輕輕語直教銀漢墮懷中未遣星妃鎮來去  
濁水清波何異源濟河水清黃河渾安得薄霧起細裙  
手接雲輶呼太君

右夏

月浪衝天天宇濕涼蟾落盡疎星入雲屏不動掩孤嘖  
西樓一夜風箏急欲織相思花寄遠終日相思却相怨  
但聞北斗聲迴環不見長河水清淺金魚鎖斷紅桂春  
古時塵滿鴛鴦茵堪悲小苑作長道玉樹未憐亡國人  
瑤琴惜惜藏楚弄越羅冷薄金泥重簾鈎鸚鵡夜驚霜  
喚起南雲繞雲夢雙瑤丁丁聯尺素內記湘川相識處  
歌唇一世銜雨看可惜馨香手中故

右秋

天東日出天西下雌鳳孤飛女龍寡青溪白石不相望  
堂中遠甚蒼梧野凍筆霜華交隱起芳根中斷香心死  
浪乘畫舸憶蟾蜍月娥未必嬋娟子楚管蠻絃愁一槩  
空城舞罷腰支在當時歡向掌中銷桃葉根根雙姊妹  
破鬟矮墮凌朝寒白玉燕釵黃金蟬風車雨馬不持去  
蠟燭啼紅怨天曙

右冬

河內詩二首

翳鼓沈沈虬水咽秦絲不上蠻絃絕姮娥衣薄不禁寒  
蟾蜍夜艷秋河月碧城冷落空濛烟簾輕幙重金鈎欄  
靈香不下兩皇子孤星直上相風竿八桂林邊九芝草  
短襟小鬢相逢道入門暗數一千春願去閏年留月小  
梳子交加香蓼繁停車佇苦留待君

右一曲樓上

閭門日下吳歌遠陂路綠菱香滿滿後溪暗起鯉魚風  
船旗閃斷芙蓉翰傾身奉君畏身輕雙橈兩槳樽酒清

莫因風雨罷團扇此曲斷腸惟北聲  
低樓小徑城南道  
猶自金鞍對芳草

右一曲湖中

河陽詩

黃河搖落

一作落

天上來玉樓影近中天臺  
龍頭瀉酒客

壽杯主人淺笑紅玫瑰  
梓澤東來七十里長溝  
複塹埋雲子可惜秋眸  
一鬢光漢陵走馬黃塵起  
南浦老魚腥古涎真珠  
密字芙蓉篇湘中寄到  
夢不到衰容自去拋

涼天憶得蛟絲裁小卓蛺蝶飛迴木棉薄綠繡笙囊不  
見人一口紅霞夜深嚼幽蘭泣露新香死畫圖淺縹松  
溪水楚絲微覺竹枝高半曲新辭寫綿紙巴西一作夜

市紅守宮後房點臂斑斑紅堤南渴雁自飛久蘆花一  
夜吹西風曉簾串斷蜻蜓翼羅屏但有空青色玉灣不  
釣三千年蓮房暗破蛟龍惜濕銀注鏡井口平鸞釵映  
月寒錚錚不知桂樹在何處仙人不下雙金莖百尺相  
風插重屋側近媽紅伴柔綠百勞不識對月郎湘竹千



條為一束

偶成轉韻七十二句贈四同舍

沛國東風吹大澤蒲青柳碧春一色我來不見隆準人  
漑酒空餘廟中客征東同舍鴛鴦酒酣勸我懸征鞍  
藍山寶肆不可入玉中仍是青琅玕武威將軍使中俠  
少年箭道驚楊葉戰功高後數文章憐我秋齋夢蝴蝶  
詰旦九門傳奏章高車大馬來煌煌路逢鄒枚不暇揖  
臘月大雪過大梁憶昔公為會昌宰我時入謁虛懷待

衆中賞我賦高唐  
迴看屈宋猶年輩  
公事武皇為鐵冠  
歷廳請我相所難  
我時顛顛在書閣  
卧枕芸香春夜闌  
明年赴辟下昭桂  
東郊慟哭辭兄弟  
韓公堆上跋馬時  
迴望秦川樹如薺  
依稀南指陽臺雲  
鯉魚食鈎猿失羣  
湘妃廟下已春盡  
虞帝城前初日曛  
謝遊橋上澄江館  
下望山城如一彈  
鷓鴣聲苦曉驚眠  
朱槿花嬌晚相伴  
頃之失職辭南風  
破帆壞槩荆江中  
斬蛟斲壁不無意  
平生自許非忽忽  
歸來寂寞靈臺下  
着破藍衫出無馬

天官補吏府中趨玉骨瘦來無一把手封狴牢屯制囚  
直廳印鎖黃昏愁平明赤帖使修表上賀嫫姚收賊州  
舊山萬仞青霞外望見扶桑出東海愛君憂國去未能  
白道青松了然在此時聞有燕昭臺挺身東望心眼開  
且吟王粲從軍樂不賦淵明歸去來彭門十萬皆雄勇  
首戴公恩若山重廷評日下握靈蛇書記眠時吞綵鳳  
之子夫君鄭與裴何甥謝舅當世才青袍白簡風流極  
碧沼紅蓮傾倒開我生粗疎不足數梁父哀吟鳴鶴舞

橫行濶視倚公憐狂來筆力如牛弩借酒祝公千萬年  
吾徒禮分常周旋收旗卧鼓相天子相門出相光青史

義山生平游歷

畧見於此篇

### 燒香曲

鈿雲蟠蟠互比魚孔雀翅尾蛟龍鬚漳宮舊樣博山鑪  
楚嬌捧笑開芙蓉八蠶繭綿分小炷獸燄微紅隔雲母  
白天月澤寒未冰金虎含秋向東吐玉珮呵光銅照昏  
簾波日暮衝斜門西來欲上茂陵樹柏梁已失栽桃魂

露庭月井大紅氣輕衫薄袖當君意蜀殿瓊人伴夜深  
金鑿不問殘燈事何當巧吹君懷度襟灰為土填清露

安平公詩

丈人博陵王名家憐我總角稱才華華州留語曉至暮  
高聲喝吏放兩衙明朝騎馬出城外送我習業南山阿  
仲子延岳年十六面如白玉欵烏紗其弟炳章猶兩州  
瑤林瓊樹含竒花陳留阮家諸姪秀遷迤出拜何駢羅  
府中從事杜與李麟角虎翅相過摩清詞孤韻有歌響

擊觸鐘磬鳴環珂三月石堤凍銷釋東風開花滿陽坡  
時禽得伴戲新木其聲尖咽如鳴梭公時載酒領從事

踴躍鞍馬來相過仰看樓殿撮

一作插

清漢坐視世界如

恒沙面熱脚掉互登陟青雲表柱白雲崖一百八句在  
貝葉三十三天長雨花長者子來輒獻葢辟支佛去空  
留韉公時受詔鎮東魯遣我草奏隨車牙顧我下筆即  
十字疑我讀書傾五車嗚呼大賢苦不壽時世方士無  
靈砂五月至止六月病遽頽泰山驚逝波明年徒步弔

京國宅破子毀哀如何西風衝戶捲素帳陳光斜照舊  
燕窠古人常歎知己少況我淪賤艱虞多如公之德世  
一二豈得無淚如黃河瀝膽祝願天有眼君子之澤方

滂沱

海上謠

桂水寒於江玉兔秋冷咽海底覓仙人香桃如瘦骨紫  
鸞不肯舞滿翅蓬山雪借得龍堂寬曉出揲雲髮劉郎  
舊香炷立見茂陵樹雲孫帖帖卧秋烟上元細字如蠶

眠

李夫人

蠻絲繫條脫妍眼和香屑壽宮不惜鑄南人柔腸早被  
秋眸割清澄有餘幽素香鰓魚渴鳳真珠房不知瘦骨  
類水井更許夜簾通曉霜土花漠漠雲茫茫黃河欲盡  
天蒼蒼

御定全唐詩錄卷七十五



欽定四庫全書

御定全唐詩錄卷七十六

李商隱

二

近體詩

令狐舍人說昨夜西掖翫月因戲贈

昨夜玉輪明傳聞近太清涼波衝碧瓦曉暈落金莖露  
索秦宮井風絃漢殿箏幾時綿竹頌擬薦子虛名

崔處士

真人塞其內夫子入於機未肯投竿起惟歡負米歸雪  
中東郭履堂上老萊衣讀遍先賢傳如君事者稀

自喜

自喜蝸牛舍兼容燕子巢綠筠遺粉籜紅藥綻香苞虎  
過遙知穿魚來且佐庖慢行成醕酌鄰壁有松醪

歸墅

行李踰南極旬時到舊鄉楚芝應徧紫鄧橘未全黃渠  
濁村春急旗高社酒香故山歸夢喜先入讀書堂

哭劉司戶

離居星歲易失望死生分酒甕  
凝餘桂書籤冷舊芸江  
風吹雁急山木帶蟬曛一叫  
千回首天高不為聞  
有美扶皇運無誰薦直言已為秦  
逐客復作楚冤魂  
浦應分派荆江有會源併將  
添恨淚一灑問乾坤

桂林

城窄山將壓江寬地共浮  
東南通絕域西北有高樓  
神護青楓岸龍移白石湫  
殊鄉竟何禱簫鼓不曾休

陳後宮

茂苑城如畫閭門瓦欲流還依水光殿更起月華樓侵  
夜鸞開鏡迎冬雉獻表從臣皆半醉天子正無愁

屬疾

許靖猶羈宦安仁復悼亡茲辰聊屬疾何日免殊方秋  
蝶無端麗寒花只暫一作更不香多情真命薄容易即迴腸

楚宮

複壁交青瑣重簾挂紫繩如何一柱觀不礙九枝燈扇

薄常窺月釵斜只鏤冰歌成猶未唱秦火入夷陵

石城

石城誇窈窕花縣更風流簾冰卑病切將飄枕簾烘不隱

鈎玉童收夜鑰金狄守更籌共笑鴛鴦綺鴛鴦兩白頭

離思

氣盡前溪舞心酸子夜歌峽雲尋不得溝水欲如何朔  
雁傳書絕相篋染淚多無由見顏色還自託微波

風雨

淒涼寶劍篇羈泊欲窮年黃葉仍風雨青樓自管絃  
新  
知遭薄俗舊好隔良緣心斷新豐酒銷愁斗幾千

槿花

燕體傷風力雞香積露文殷鮮一相雜啼笑兩難分  
月  
裏寧無姊雲中亦有君三清與仙島何事亦離羣  
珠館薰燃久玉房梳掃餘燒蘭才作燭褰錦不成書  
本  
以亭亭遠翻嫌脈脈踈迴頭問殘照殘照更空虛

蜨

葉葉復翻翻斜橋對側門蘆花惟有白柳絮可能溫西  
子尋遺殿昭君覓故村年年芳物盡來別敗蘭蓀

韓翃舍人即事

萱草含丹粉荷花抱綠房鳥應悲蜀帝蟬是怨齊王通  
內藏珠府應官解玉坊橋南荀令過十里送衣香

楊本勝說於長安見小男阿袞

聞君來日下見我最嬌兒漸大啼應數長貧學恐遲寄  
人龍種瘦失母鳳雛癡語罷休邊角青燈兩鬢絲

越燕

上國社方見此鄉秋不歸為矜皇后舞猶着羽人衣拂  
水斜紋亂銜花片影微盧家文杏好試近莫愁飛

將泥紅蓼岸得草綠楊村命侶添新意安巢復舊痕去  
應逢阿母來莫害王孫記取丹山鳳今為百鳥尊

少將

族亞齊安陸風高漢武威煙波別墅醉花月後門歸青  
海聞傳箭天山報合圍一朝攜劍起上馬即如飛



無題

照梁初有情出水舊知名裙衩芙蓉小釵茸翡翠輕錦  
長書鄭重眉細恨分明莫近彈碁局中心最不平

落花

高閣客竟去小園花亂飛參差連曲陌迢遞送斜暉腸  
斷未忍掃眼穿仍欲歸

一作  
稀

芳心向春盡所得是沾衣

楚澤

夕陽歸路後霜野物聲乾集鳥翻漁艇殘虹

一作  
紅

拂馬

鞍劉楨元抱病虞寄數辭官白袷經年卷西來及  
一作

又

早寒

蟬

本以高難飽徒勞恨費聲五更疎欲斷一樹碧無情薄  
宦梗猶汎故園蕪已平煩君最相警我亦舉家清

鄠杜馬上念漢書

世上蒼龍種人間武帝孫小來惟射獵興罷得乾坤渭  
水天開苑咸陽地獻原英靈殊未已丁傳漸華軒

柳

動春何限葉撼曉幾多枝解有相思苦應無不舞時絮  
飛藏皓蝶帶弱露黃鸝傾國宜通體誰來一作獨賞眉

詭柳

已帶黃金縷仍飛白玉花長時須拂馬密處少藏鴉眉  
細從他斂腰輕莫自斜玳梁誰道好偏擬映盧家

無題

含情春曉晚暫見夜闌干樓響將登怯簾烘欲過難多

羞釵上燕真愧鏡中鸞  
歸去橫塘曉華星送寶鞍

蝶

初來小苑中稍與瑣闌通  
遠恐芳塵斲輕憂豔雪融  
只知防浩露不覺逆尖風  
回首雙飛燕乘時入綺櫳

月

池上與橋邊難忘復可憐  
簾開最明夜簾卷已涼  
天流處水花急吐時雲葉鮮  
姮娥無粉黛只是逞嬋娟

李花

李徑獨來數愁情相與懸自明無月夜強笑欲風天減  
粉與園籜分香沾一作活渚蓮徐妃久已嫁猶自玉為鈿

寄裴衡

別地蕭條極如何更獨來秋應為黃一作紅葉雨不厭青

苔沈約只能瘦潘仁豈是才離情堪底寄惟有冷於灰

即日

小苑試春衣高樓倚暮暉天桃惟是笑舞蝶不空飛赤  
嶺久無耗鴻門猶合圍幾家綠錦字含淚坐鴛機

晚晴

深居俯夾城，春去夏猶清。  
天意憐幽草，人間重晚晴。  
併添高閣迥，微注小牕明。  
越鳥巢乾後，歸飛體更輕。

所居

牕下尋書細，溪邊坐石平。  
水風醒酒病，霜日曝衣輕。  
雞黍隨人設，蒲魚得地生。  
前賢無不一作無謂容易，即遺名。

高松

高松出衆木，伴我向天涯。  
客散初晴候，僧來不語時。  
有

風傳雅韻無雪試幽姿上藥終相待他年訪伏龜

訪秋

酒薄吹還醒樓危望已窮江臯當落日帆席見歸風煙  
帶龍潭白霞分鳥道紅殷勤報秋意只是有丹楓

昭州

桂水春猶早昭州日正西虎當官道關猿上驛樓啼繩  
爛金沙井松乾乳洞梯鄉音殊一作可駭仍有醉如泥

陸發荆南始至商洛

昔去真無奈，今還豈自知。  
青辭木奴橘，紫見地仙芝。  
四海秋風濶，千嵒暮景遲。  
向來憂際會，猶有五湖期。

陳後宮

玄武開新苑，龍舟讌幸頻。  
渚蓮參法駕，沙鳥犯勾陳。  
壽獻金莖露，歌翻玉樹塵。  
夜來江令醉，別詔宿臨春。

樂遊原

春夢亂不記，春原登已重。  
青門弄煙柳，紫閣舞雲松。  
拂硯輕冰散，開樽綠酒濃。  
無悰託詩遣，吟罷更無悰。



贈子直花下

池光忽隱墻花氣亂侵房屏綠

倪甸切

蝶留粉牕油蜂印

黃官書推小吏侍史從清郎並馬更吟去尋思有底忙

小園獨酌

柳帶誰能結花房未肯開空餘雙蝶舞竟絕一人來半  
展龍鬚席輕斟瑪瑙杯年年春不定虛信歲前梅

獻寄舊府開封公

幕府三年遠春秋一字褒書論秦逐客賦續楚離騷地

理

一作里

南溟濶天文北極高  
酬恩撫身世未學勝鴻毛

春游

橋峻斑駁疾川長  
白鳥高烟輕惟潤柳風濫欲吹桃徒  
倚三層閣摩挲七寶刀  
庾郎年最少青草妒春袍

離席

出宿金樽掩從公  
玉帳新依依向餘照  
遠遠隔芳塵細草翻  
驚鴈殘花伴醉人  
楊朱不用勸只是更沾巾

細雨

蕭灑傍迴汀，依微過短亭。  
氣涼先動竹，點細未開萍。  
稍促高高燕，微踈的的螢。  
故園煙草色，仍近五門青。

商於新開路

六百商於路，崎嶇古共聞。  
蜂房春欲暮，虎窠日初曛。  
路向泉間辨，人從樹杪分。  
更誰開捷徑，速擬上青雲。

題鄭大有隱居

結構何峯是，喧間此地分。  
石梁高瀉月，樵路細侵雲。  
偃卧蛟螭室，希夷鳥獸羣。  
近知西嶺上，玉管有時聞。

夜飲

卜夜容衰鬢開筵屬異方燭分歌扇淚雨送酒船香江  
海三年客乾坤百戰場誰能辭醕酌淹卧劇清漳

因書

絕徼南通棧孤城北枕江猿聲連月檻鳥影落天牕海

一作  
錦

石分碁子郟筒當酒缸生歸話辛苦別夜對凝缸

春宵自遣

地勝遺塵事身閒念歲華晚晴風過竹深夜月當花石

亂知泉咽苔荒任逕斜陶然恃琴酒忘却在山家

訪隱

路到層峯斷門依老樹開月從平楚轉泉自上方來  
薤白羅朝饌松黃暖夜杯相留笑孫綽空解賦天台

寓興

薄宦仍多病從知竟遠遊談諧叨客禮休澣接冥搜  
樹好頻移榻雲奇不下樓豈闕無景物自是有鄉愁

河清與趙氏昆季讌集得擬杜工部

勝槩殊江右佳名逼渭川虹收青嶂雨鳥沒夕陽天客  
鬢行如此滄波坐渺然此中真得地漂蕩釣魚船

寓目

園桂懸心碧池蓮飮眼紅此生真遠客幾別即衰翁小  
幌風烟入高牕霧雨通新知他日好錦瑟傍朱櫳

登霍山驛樓

廟列前峰迴樓開四望窮嶺巖嵐色外陂雁夕陽中弱  
柳千條露衰荷一面風壺關有狂孽速繼老生功

思賢頓

內殿張絃管中原絕鼓鞀舞成青海馬鬪殺汝南雞不  
見華胥夢空聞下蔡迷宸襟他日淚薄暮望賢西

桂林路中作

地暖無秋色江晴有暮暉空餘蟬嘒嘒猶向客依依村  
小犬相護沙平僧獨歸欲成西北望又見鷓鴣飛

商於

商於朝雨霽歸路有秋光背塢猿收果投巖麝退香建

瓊真得勢橫戟豈能當割地張儀詐謀身綺季長清渠  
州外月黃葉廟前霜今日看雲意依依入帝鄉

和孫樸韋蟾孔雀詠

此去西梁遠今來萬里攜三施因網得秦客被花迷可  
在青鸚鵡非闕碧野雞約眉憐翠羽刮目一作膜想金篦

瘴氣籠飛遠蠻花向坐低輕於趙皇后貴極楚懸黎都  
護矜羅幕佳人炫繡桂屏風臨燭釵捍撥倚香臍舊思  
牽雲葉新愁待雪泥愛堪通夢寐畫得不端倪地錦排



蒼雁簾釘鏤白犀曙霞星斗外涼月露盤西妒好休誇  
舞經寒且少啼紅樓三十級穩穩上丹梯

酬令狐郎中見寄

望郎臨古郡佳句灑丹青應自丘遲宅仍過柳惲汀封  
來江渺渺信去雨冥冥句曲聞仙訣臨川得佛經朝吟  
搯客枕夜讀漱僧瓶不見銜蘆雁空流腐草螢土宜悲  
坎井天怒識雷霆象卉分疆近蛟涎浸岸腥補羸貪紫  
桂負氣託青萍萬里懸離抱危於訟閣鈴

碧瓦

碧瓦銜珠樹紅輪結綺寮無雙漢殿鬢第一楚宮腰露  
唾香難盡珠啼冷易銷歌從雍門學酒是蜀城燒柳暗  
將翻巷荷欹正抱橋鈿轅開道入金管隔隣調夢到飛  
魂急書成即席遙河流衝柱轉海沫近槎飄吳市蛭蜺  
甲巴寶翡翠翹他時未知意重叠贈嬌

西溪

悵望西溪水潺湲奈爾何不驚春物少只覺夕陽多色

染妖韶柳光含窈窕  
羅人間從到海天上  
莫為河鳳女  
彈瑤瑟龍孫撼玉珂  
京華他夜夢好好寄雲波

元微先生

仙翁無定數時入一壺  
藏夜夜桂露濕村村  
桃水香醉中拋浩劫  
宿處起神光藥裏丹  
山鳳碁函白石郎  
弄河移砥柱吞日倚扶  
桑龍竹裁輕策鮫綃  
熨下裳樹栽嗤漢帝  
橋板笑秦王徑欲隨  
關令龍沙萬里強

獨居有懷

麝重愁風逼羅疎畏月侵怨魂迷恐斷嬌喘細疑沉數  
急芙蓉帶頻抽翡翠簪柔情終不遠遙妒已先深浦冷  
鴛鴦去園空蛺蝶尋蠟花長遞淚箏柱鎮移心覓使嵩  
雲暮迴頭灞岸陰只聞涼葉院露井近寒砧

有感

乙卯年有感  
丙辰年詩成

九服歸元化三靈叶睿圖如何本初輩自取屈羗誅有  
甚當車泣因勞下殿趨何成奏雲物直是滅萑苻證逮  
符書密辭連性命俱竟緣尊漢相不早辨胡雛鬼錄分

朝部軍烽照上都敢云堪慟哭未免怨洪爐

丹陛猶敷奏彤庭歛戰爭臨危對盧植始悔用龐萌御

仗收前殿

一作隊

兵徒劇背城蒼黃五色棒掩過一陽生

古有清君側今非乏老成素心雖未易此舉太無名誰

瞑銜寃目寧吞欲絕聲近聞開壽讌不廢用咸英

錢龍惕箋

曰甘露之變從古未有也關豎橫行南司塗炭當時士大夫深疾訓注之奸邪反若假手宦寺殲除大慙者一時如鄭覃李石以不忤中人而命相矣李德裕李宗閔以訓注所逐而量移矣令狐楚號為仇士良所不悅而上問王涯手書反狀則應曰然矣節度使兵仗叅辭則乞停罷矣汲汲然惟恐得罪宦官以取禍後世不咎文

宗之不密失臣則恨訓注之狂躁誤國而當日情勢未  
有寬論之者可異也自古以來宦官盜竊國柄莫橫于  
漢之十常侍故何進等謀誅之不勝反為所殺然進之  
謀進始之非命于靈帝也訓內與文宗謀而外連藩鎮  
以誅宮奴謂之奉天討可也詭言甘露袁甲帷幄謂之  
謀勇可也事已敗裂猶攀呼乘輿投身虎口謂之死事  
可也迨奄人得志身分族滅此時文宗稍欲救之則有  
關樂望夷之禍天道至此不可問矣何獨區區罪訓也  
使非平日傾險君子猶將與之不成之責何乃甚乎其  
時設國有重臣不畏強禦倡言訓等之無辜士良諸凶  
猶未必刃加其頸也乃籍口不言而請王涯三相罪名  
僅僅出于劉從諫亦可恥矣義山詩云古有清君側今  
非乏老成素心雖未易此舉太無名誰瞋銜寃目寧吞  
欲絕聲其感憤激烈有不同于衆論者故特表而出之

鏡檻

鏡檻芙蓉入香臺翡翠過撥弦驚火鳳交扇拂天鷲隱  
忍陽城笑喧傳郢市歌仙眉瓊作葉佛髻鈿為螺五里  
無因霧三秋只見河月中供藥剩海上得綃多玉集胡  
沙割犀留聖水磨斜門穿戲蝶小閣鎖飛蛾騎檐侵鞞  
卷車帷約憶鉞傳書兩行雁取酒一封馳橋迴涼風壓  
溝橫一作斜夕照和待烏燕太子駐馬魏東阿想像鋪芳  
褥依稀解醉羅散時簾隔露卧後幕生波梯穩從攀桂  
弓調任射莎豈能拋斷夢聽鼓事朝珂

送千牛李將軍赴闕五十韻

照席瓊枝秀當年紫綬榮班資古直閣勳伐舊西京在  
昔王綱紊因誰國步清如無一戰霸安有大橫庚內豎  
依憑切凶門責望輕中台終惡直上將更邀盟丹陛祥  
烟滅皇闈殺氣橫喧闐衆狙怒容易八蠻驚檮杌寬之  
久防風戮不行素來矜異類此去豈親征舍魯真非策  
居邠未有名曾無力牧御寧待雨師迎火箭侵乘石雲  
橋逼禁營何時絕刁斗不夜見攙搶屢亦聞投鼠誰其



敢射鯨世情休念亂物議笑輕生  
大鹵思龍躍蒼梧失象耕靈衣沾愧汗儀馬困陰兵  
別館蘭薰酷深宮蠟燭明黃山遮舞態  
黑水斷歌聲縱未移周鼎何辭免趙坑

空拳

當作券

轉鬪地數板不沈城且欲憑神算無因計力

爭幽囚蘇武節棄市仲由纓下殿言終驗增埋事早萌  
蒸雞殊減饒屑麴異和羹否極時還泰屯餘運果亨流  
離幾南度倉卒得西平神鬼收昏黑姦兇首

去聲

滿盈官

非督護貴師以丈人貞覆載還高下寒暄急改更馬前

烹莽卓壇上揖韓彭扈蹕三才正回軍六合晴此時惟  
短劍仍世盡雙旌顧我猶羣從逢君歎老成慶流歸嫡  
長貽厥在名卿隼擊須當要鵬搏莫問程趨朝排玉座  
出位泣金莖幸藉梁園賦叨蒙許氏評中郎推貴壻定  
遠重時英政已標三尚人今佇一鳴長刀懸月魄快馬  
駭星精披豁慚深眷睽離動素誠蕙留春晚晚松待歲  
崢嶸異縣期迴雁登時已飯鯖去程風刺刺別夜漏丁  
丁庾信生多感楊朱死有情絃危中婦瑟甲冷想夫箏

會與

去聲

秦樓鳳俱聽漢苑鶯洛川迷曲沼烟月兩心傾

詠懷寄秘閣舊僚二十六韻

年鬢日堪悲衡茅益自嗤攻文枯若木處世鈍如鎚敢

忘垂堂戒寧將暗室欺懸頭曾苦學折臂反成醫僕御

嫌夫懦孩童笑叔癡小男方嗜粟幼女漫憂葵遇灸一作

為誰先噉逢齏即便

一作更

吹官銜同畫餅面貌乏凝脂

典籍將蠡測文章若管窺圖形翻類狗入夢肯非羆自

哂成書簾終當呪酒卮懶沾襟上血羞鑷鏡中絲橐籥

言方喻樗蒟齒詎知事神徒惕慮佞佛愧虛辭曲藝垂  
麟角浮名狀虎皮乘軒寧見寵巢幕更逢危禮俗拘嵇  
喜侯王忻戴逵途窮方結舌靜勝但搯頤糲食空彈劍  
亨衢詎置錐柏臺成口號芸閣暫肩隨悔逐遷鶯伴誰  
觀擇虱時甕間眠太率牀下隱何卑奮迹登弘閣推心  
對董帷狡讐如有暇松竹一相思

自桂林奉使江陵途中感懷寄獻尚書

下客依蓮幙明公念竹林縱然膺使命何以奉徽音投

刺雖傷晚酬恩豈在今  
迎來新瑣闥從到碧瑤岑  
水勢初知海天文始識參  
固慚非賈誼惟恐後陳琳  
前席驚虛辱華樽許細斟  
尚憐秦痔苦不遣楚醪沈  
既載從戎筆仍披選勝襟  
瀧通伏波柱簾對有虞琴  
宅與嚴城接門藏列岫深  
閣涼松冉冉堂靜桂森森  
社內容周續鄉中保展禽  
白衣居士訪烏帽逸人尋  
佞佛將成縛耽書或類淫  
長懷五穀贖終著九州箴  
良訊封鴛綺餘光借玳簪  
張衡愁浩浩沈約瘦悒悒  
蘆白疑粘鬢楓丹欲照

心歸期無鴈報旅抱有猿侵短日安能駐低雲只有陰

亂鴉衝暎

即晒字

網寒女簇遙砧東道違寧久西園望不

禁江生魂黯黯泉客淚泔泔逸翰應藏法高辭肯浪吟  
數須傳庾翼莫獨與盧謀假寐憑書簾哀吟叩劍鐔未  
嘗貪偃息邠復擬登臨彼美迴清鏡其誰受曲針人皆  
向燕路無乃費黃金

五言述德抒情詩一首四十韻獻上杜七兄僕射

相公

帝作黃金闕仙開白玉京有人扶太極惟嶽降元精耿  
賈官勲大荀陳地望清旂常懸祖德甲令著嘉聲經出  
宣尼壁書留晏子楹武鄉傳陣法踐土主文盟自昔流  
王澤由來仗國楨九河分合沓一柱忽崢嶸得主勞三  
顧驚人肯再鳴碧虛天共轉黃道日同行後飲曹參酒  
先和傳說羨即時賢路闢此夜秦階平願保無疆福將  
圖不朽名率身期濟世叩額慮興兵感念殽屍露咨嗟  
趙卒坑儻令安隱忍何以贊貞明惡草雖當路寒松實

挺生人言真可畏公意本無爭故事留臺閣前驅且旆  
旌芙蓉王儉府楊柳亞夫營清嘯頻踈俗高談屢析醒  
過庭多令子乞墅有名甥南詔應聞命西山莫敢驚寄  
辭收的博端坐掃欂槍雅宴初無倦長歌底有情檻危  
春水暖樓迴雪峯晴移席牽湘一作蔓迴橈撲絳英誰

知杜武庫只見謝宣城有客趨高義於今滯下卿登門  
慚後至置驛恐虛迎自是依劉表安能比老彭雕龍心  
已切畫虎意何成豈有一作曾黔突徒勞不倚衡乘時



乖巧宦占象合艱貞廢忘淹中學遲迴谷口耕悼傷潘  
岳重樹立馬遷輕隴烏悲丹背相蘭怨紫莖歸期過舊  
歲旅夢遼殘更弱植叨華族衰門倚外兄欲陳勞者曲  
未唱淚先橫

今月二日不自量度輒以詩一首四十韻干瀆尊  
嚴伏蒙仁恩俯賜披覽獎踰其實情溢于辭顧  
惟疎蕪曷用酬戴輒復五言四十韻詩獻上亦  
詩人咏歎不足之義也

家擅無雙譽朝居第一功四時當首夏八節應條風滌  
濯臨清濟巉巖倚碧嵩鮑壺水皎潔王佩玉丁東處劇  
張京兆通經戴侍中將星臨迴夜卿月麗層穹下令銷  
秦盜高談破宋聾含霜太山竹拂霧嶧陽桐樂道乾知  
退當官蹇匪躬服箱青海馬入兆渭川熊固是符真宰  
徒勞讓化工鳳池春潋灩雞樹曉瞳矐願守三章約還  
期九譯通薰琴調大舜寶瑟和神農慷慨資元老周旋  
值狡童仲尼羞問陳魏絳喜和戎款款將除蠹孜孜欲

達聰所求因涓濁安肯與雷同物議將調鼎君恩忽賜  
弓開吳相上下全蜀占西東銳卒魚懸餌豪胥鳥在籠  
疲民呼杜母隣國仰羊公置驛推東道安禪合北宗嘉  
賓增重價上士悟真空扇舉遮王導樽開見孔融烟飛  
愁舞罷塵定一作起惜歌終岸柳兼池綠園花映燭紅未  
曾周顛醉轉覺季心恭繫滯喧人望便蕃屬聖衷天書  
何日降庭燎幾時烘早歲乖投刺今晨幸發蒙遠途哀  
跛鼈薄藝獎雕蟲故事曾尊隗前修有薦雄終須煩刻


畫聊擬更磨礮巒嶺晴留雪巴江晚帶楓營巢憐越燕  
裂帛待燕鴻自苦誠先藥長飄不後蓬容華雖少健思  
緒即悲翁感激淮山館優游碣石宮待公三八相丕祚  
始無窮

寄太原盧司空三十韻

隋艦臨淮甸唐旗出井陘斷鼉搯四柱卓馬濟三靈祖  
業隆盤古孫謀復大庭從來師俊傑可以煥丹青舊族  
開東岳雄圖奮北溟邪同獬廌觸樂伴鳳凰聽酣戰仍

揮日降妖亦鬪霆將軍功不伐叔舅德惟馨雞塞誰生  
事狼烟不暫停擬填滄海鳥敢競太陽螢內草纔傳詔  
前茅已勒銘那勞出師表盡入大荒經德水縈長帶陰  
山繞畫屏祗憂非紫肯未覺有臙腥保佐資冲漠扶持  
在杳冥乃心防暗室華髮稱明廷按甲神初靜揮戈思  
欲醒羲之當妙選孝若近歸寧月色來侵幌詩成看轉  
櫺羅含黃菊宅柳憚白蘋汀神物龜酬孔僊才鶴姓丁  
西山童子藥南極老人星自頃徒窺管於今愧挈瓶何

由叨末席還得叩玄扃  
莊叟虛悲雁終童漫識  
艇幕中雖策畫劍外且  
伶俜侯侯行忘止鰥鰥  
卧不瞑身應瘖於魯淚  
欲溢為榮禹貢思金鼎  
堯圖憶土釧公乎來入  
相王欲駕云亭



御定全唐詩錄卷七十六